

## 7- EINOTO E ISAAK; OLASAR LE ISAAK Enkiterunoto 21, 22

Ore etulusoitie ilarin tikitam o imiet eidipa Enkai eisiligie Abraham eishoi sapuk, neisho Sarah enkayioni anaa anatiaka Olaitoriani. Neji Isaak, enkipirta enye “enkuenia” amu etakuenia Sarah apa pee ejo Enkai iisho. Ore Isaak nebulu neaku olayioni.

Ore enkolong’ nabo, netem Enkai Abraham nejoki, “Abraham.” Nejo ninye, “Nele nanu.” Nejoki, “Toriko olayioni lino Isaak ilo laa ninye ake iata, ilo linyor, nipuopuo enkop e Moria, nintayu ninye te ine metaa olasar o pejori te nchumata o ldoinyo obo laaliki.”

Metaa einyo Abraham tadekenya enasirie neirot osikiria lenye, nerik ilbarnot lenyena oare tenebo olayioni lenye Isaak. Nedung’u ilkeek ooinokie olasar opejori nedumunye alo ewueji netiaka ninye Enkai. Ore te nkolong’ e uni, neraposhu Abraham inkonyek nedol ewueji nelakua. Nejoki Abraham ilbarnot lenyena. “Entotoni tene tenebo ele sikiria pee alo nanu o layioni idie aaseremisho peyie kintoki aashukunye.” Neya Abraham ilkeek ooinokieki olasar opejori, neiteleiki oloililai le Isaak enkayioni enye. Nenap te nkaina enye enkima o enkalem. Nepuo pokira are aairiamari.

Nejoki Isaak papaai lenye Abraham, “Papaai!” Nejo Abraham, “Nele nanu enkayioni ai.” Nejo Isaak, “Ing’ura ajo kiata enkima o lkeek paa koree doi olkuo le kerr likintainye olasar opejori?” Nejo Abraham, “Ekeisho Enkai kewan olkuo le kerr lo lasar opejori enkayioni ai.”

Kaae, nepuo pokira are aairiamari. Ore peyie ebau ewueji natuutaka Enkai ninye, neshetu Abraham olperere lo lasar te ine neirragie ilkeek aitobiraki, neen Isaak olayioni lenye, neirragie ninye te wueji o lasar te nchumata oo lkeek. Neitorioo Abraham enkaina enye nedumu enkalem nayieng’ie enkayioni enye. Kake eipoto ninye olmalaika lo Laitoriani eng’uaa keper ejoki, “Abraham! Abraham!” Nejo ninye, “Nele nanu.” Nejo, olmalaika, “Minteleiki enkaina ino olayioni anaa intaas ninye ae, amu atayiolo taata ajo iure Enkai amu atoduaa ajo eitu kimitiki enkayioni ino naa ninye ake iata.”

Neraposhu Abraham inkonyek enyena aing’orisho nedol te siadi ninye olmeregesh otaasha entim imowuarak enyena, nelu Abraham aya ilo meregash, neitayu ninye aitaas olasar opejori te rishata e nkayioni enye. Neipot Abraham ine wueji ajo, “Eneishorunye Olaitoriani.” Naa ina arna eeta ine o taata, ore to ldoinyo lo Laitoriani keishoruni.

Neitoki olmalaika lo Laitorriani aipot Abraham enkata e are eng’uaa shumata. Nejo, “Ainosa nanu omumai te kewan ai, ejo Olaitoriani, ‘Ore amu itaasa ena neitu imit enkayioni ino aa ninye ake iata, ekaamayian iyie oleng’, naa kaponaa eishoi ino metotiwuo anaa ilakir le keper netiu sii anaa osinyai le nkiyopata enaiposha. Ore eishoi ino neaku e nenyekishomi oo ilmang’ati lenye (nemir ilmang’ati lenye). Naa tiatua eishoi ino emayian iloshon le nkop pooki ate, amu itoning’o oltoilo lai.”

## ENKIPANGATA E NKISOMA

### **ENE DUKUYA: Inkilikuana ena kilikuanata eton eitu iliki enkatini**

- Idamu erishata nikitiaka oltung'ani taasa embae nemening'unoyu? Kaa itaasa tialo ina?

### **ENKATINI: Toliki enkatini ningiligili tenebo anaa olturrur pee eyiolo pooki ng'ae**

### **INKIKILIKUANAT NAIMAKINI TENEBO: Taasishore kuna kilikuanat pee irororie tenebo enaikununo enkatini**

#### **KAINYIOO KINTENG'ENA ENA ATINI NAIPIRTA ENKAI?**

- **Kaji eiko teneitodolu ena atini nchere keata Enkai enkidimata sapuk?** (engolon, enkitoria)
  - o Eishoo Sara enkayioni ata etamorua
  - o Eata engolon naitanapie Abraham
  - o Eishorua olasar te rishata Isaak
- **Kaji eiko teneitodolu ena atini nchere eisinyati Enkai? (keitoriori, kaasipani, neishoru inkitanapat, niba ing'ok, neipotu keeya metaa olekoisiayio loo ng'ok)**
  - o Keishiakino neatae olasar lo sarge. Keibalunye olasar ing'ok oo ltung'ana o esinyatisho e Nkai. Meata ai oitoi nalotunye oltung'ani enetii Enkai.
  - o Eibung'a olmerregesh ilkiku imowarak pee medung' entim ninye. Amu meishiakino neata enkerr o lasar entioto.
  - o Ore olasar laa ninye otinjing'a erishata o ilaing'okok naa ilo oishorua Enkai.
  - o Eishoo Enkai Abraham enkitanapata. Nemeata nchere pee mening'.
- **Kaji eiko ena atini teneiteng'en iyiook inchere keata Enkai empiris?** (kenyorrisho, keata olng'urr tialo ilaing'okok, nenana oshoke, neton ake eirorie oltung'ani)
  - o Keishorua olmerregesh metaa olasar. Meata ai oitoi napuonunye ilaing'okok aaserem Enkai. Neisho Abraham enkoitoi manyita enkitanapata anaa enkoitoi najeunye Isak.
  - o Enkisiligata o mayianat too iishoritin kumok, o emirishoi too lmang'ati, namayiani ilosho pooki eimu eishoi enye.
  - o Neipot ine ajo – Jehova Jire – Eneishorunye Enkai.
- **Kaji eiko ena atini teneutaki iyiook inchere KEISILIGAYU Enkai? ( meiblekenya, keibung inkisiligat enyena, keas sii inaja)**
  - o Neisho Enkai Abraham enkayioni anaa enaisiligie.
  - o Neishoru enkoitoi pee eishiu Isak neitabari sii enkisiligata eimu Isak anaa enetejo ninye.

#### **KAINYIOO KINTENG'ENA ENA ATINI NAIPIRTA OLTUNG'ANI?**

- Meata apa Isak enkidimata pee eitajuo kewan.
- Keidim ake Abraham aitishipa Enkai te enkoitoi e nkirukoto.

#### **KAINYIOO KINTENG'ENA ENA ATINI NAIPIRTA OSOTUA OLTUNG'ANI O ENKAI? (ENJEUNOTO)**

- Ore eimu enkirukoto eanyita Abraham enkitanapata ata hoo teneitu apa eiyiolou ninye. Ekintodolu enkirukoto nasipa te nkoitoi enkanyit.
- Olasar sinyati ake lemeata entioto oidim aidipa te erishata oo ng'ok ang'. Ashu oidim atalaa esile nikiata tenkaraki ing'ok ang'.

#### **INKIKILIKUANAT NIKIASISHORE TE NKIBELEKENYATA E NKISHUI (Tegelu nabo):**

- Eitu emit Abraham enkerai enye nabo eitu eishoo Enkai. Amaa kakua tokitin oshi eibung' iltung'ana aamitiki Enkai? Kainyioo iyie imbung'ita? Ketia oitoi indim iyie aisiliga Enkai oleng'?
- Ketii erishata nidamu natomonuo Enkai entoki nemening'unoyu? Kaji kinko pee kintagol ena atini pee intashe te nkirukoto?